

De Lodderaars (3)

Peter Kroamer

In 't veurleste nummer van de Darde Klokke, he'k oe achter e'loat'n met de belofte da'k nog een moal zol schriem oaver 'n Poasbult en oaver 't viefjoareg bestoan van de Lodderaars. Gien iene hef me'j verzög umme 't astoeblijf noa te loat'n, 't mag weez'n da'j 't iens niet e'leez'n hebt, of dat a'j denkt: ie doet maar wat a'j niet loat'n kunt. Aanderzieds, 'n enkel iene hef me'j verzög umme wel vedan te goan en niet zo maar de eerst'n de best'n. Nee, geboortege Ommer, zoas 'n dochter van Luttikhof en Jenny de Jager - Schuurman, ie weet wel van 't pann'nfebriekie, 't ienegste maagie dat em mös redd'n in 'n nös met jongs. Harry Woertink slöt em doarbe'j an. (Niet be'j dat nös, maar be'j 't verzuuk). En as oe 'n veurzitter van d'Oll Ommer zo wat vrög, dan he'j te luster'n.

Mien moe zee altied dat een deel hars'n cell'n oafstarm be'j elk pilsie dat as ik drinke. Hele-moale woar kan dat niet weez'n, want dan was mien'n kop al kats leug ewes. En dan kon'k ook gien kopzeerte hebb'n, zoas noa de feestoamend van d'Oll Ommer. Weer gien moate e'hold'n, maar joa, as 't bier ook veur niks is. Of dat 't now wel of niet van de draank kump, ik heb oe al verteld dat mien geheug'n niet meer is, wat as 't was. En doarvan he'k Bé van Dijks e'vraagd umme es an tekomm'n en te heur'n wat as den nog wös. We'j hebt völle, mooie herinnering'n op e'haald, maar dat zien geheug'n now onmeunug better is as 't miene, dat kan'k niet zegg'n. En Bé drinkt aliens niet!

Be'j Jopie Melenhorst ha'k meer gelukke. Niet dat den me'j als kon vertell'n, maar Jopie had nog wel twee filmrollegies uut die tied. Doar he'k me'j wel met e'red, zo'n vieftig oafdrukk'n waar'n 't resultaat. En viefenzeumtug guld'n uut de knippe, maar doar kump allig 'n moal 'n sponsor veur. Redaktie? Wat 'n wille he'j dan, aj die foto's van zowat veertug joar terugge onder oog'n kriegt. Niet dat d'r gien vraag'n open blijft, maar d'r kwaamp wel zo völle weer boov'n, dat a'k me'j lilluk maake, dan kan'k wel vief Darde Klokke's vol schriem. Nee, maak oe maar niet druk, ik beloove oe dat dit warkeluk 't veurleste is. Disse moal de feestwekke en 'n ander moal de Poasbult en zo meer.

'T viefde joar (1963) hebt de Lodderaars niet enkel 'n wielerronde organiseert, maar ze'j woll'n dat t'r 'n wekke lang wat te doen was. Doar kwaamp 't volgende uut:

- Rondrit van de Lodderaars deur Ommen.
- Voetbalwedstried: Ommen 1 teeg'n de Lodderaars
- Stroat'nloop deur Ommen
- Volleybal toernooi
- Openbare daansoamend
- Wielerronde

De Lodderaars werd'n op e'deeld in paar'n, die ieder iene van die oamend'n mös organiseer' n. Veur de rondrit waar'n ze twee waagens met peerd'n neudeg. Van Schottert (de Bootsman) van 'n Achteres in Arriën, konn'n ze 'n menkoare met peerd lien'n en van Jacob van de Boon (van 'n Koeksenbelt) 'n sjees. 'T peerd kwaamp van Schottert (Fekken) uut Gietem en Gait Hendrik Schottert wol wel koetsier weez'n. Wie as 'n aandern koetsier was wös ik niet meer, tot da'k op 'n foto zaage dat a'k zelf de liene in de haande hadde. Crescendo gunk d'r veuran, kompleet met drumband, en doar veur leup'n 'n stel jong'n met 'n spandoek met de tekst: "1958 vijfjaar lodderaars 1963". Terra, de fotograaf was d'r ook be'j.

Ie zult begriep'n dat de Lodderaars veur de geleg'nheid strak in 't pak staak'n en doarbe'j hadd'n zej 'n hoog'n hoed op en 'n enkel'n grote, zwarte paraplu met Lodderaars d'r op. Hoe kwaam'n ze an zovulle hoed'n? Den zien va had d'r iene en dan zien grova ook, maar dat was be'j lange niet genog. Dus gunk Peter be'j Max achter op de scooter, den had toen al 'n Heinkel, noar Jan Stien an 'n Bouwende. Vanwege zien beroep had den d'r 'n stuk of wat. Veur iene wekke konn'n we'j die krieg'n, maar wees d'r zuuneg op. Joa, dat kump goed Stien. En dat kuj net geleuv'n. Weerumme noar Max zien huus an 'n Hardenbargerweg, op de scooter, zett'n ze allebeide al 'n hoog'n hoed op. 'T kon vanzelf niet uutbliem, Max weej'n em oaf Of dat zo mōs weez'n, achter oons vaar'n Ab Makkinga, den toen veur Gait Stien van de markt wark'n. Of dat e 't veur had, kan'k niet bewiez'n, maar 't rad van de auto gunk iets be'j en joa, net oaver den hoed

hen. Zo plat as 'n dubbeltie. In gedach'n zaag Peter al hoe as Max met die flatte weer be'j Jan Stien an zol komm'n. 'T veul niet met umme 'n arnstug gezich te trekk'n. We'j zult 'n hoed wel uut e'dōkt hebb'n, hoe 't ook was, be'j alle evenement'n koj de Lodderaars kenn'n an de hoge hoed'n, die as ze op hadd'n.

Wieder de voetbalwedstried teeg'n Ommen 1. Veur die tied hadd'n de Lodderaars al 'n oef-nwedstried e'spōld teeg'n de Amboneez'n (in die tied sprak ie van de zwart'n, zonder dat d'r iene helleg werd) op 't voetbalveld van Vilsteren, an de deurgoande weg, woar as now enkel karstdann'n stoat. De uutslag stiet me'j niet meer be'j.

De meeste Lodderaars deud'n an voetbal, enkel Max niet. Maar Flippie zat veur zien wark op zee en Dickie Oco en Sjoepsel konn'n niet op tied weez'n, die bint later in e'vall'n. Doarvan waar'n de Lodderaars 'n stuk of wat gastspōllers neudeg, dat waar'n Gerard Beelen uut Nunspeet, Harman van Jewans van Alderen, den kon machteg gispelen en Eddy Driesen (Bakkertie). Ommen had 'n best elftal met Gait Ekkelkamp, Joop Becking, Jan van der Hulst (Rakki Tajang), Otto Wusing en Evert Kothuus op doel, umme d'r enkel'n te nuum'n. Johan (meister) Kamphuus deud de oaftrap op 't mooie veld be'j 't Loar en Dries Bult was d'r toen ook al be'j.

'T begōn niet best veur de Lodderaars, Jopie kreeg de balle verkeerd op 'n kop en den vleug pardoes achter Gerrit Bouwhuus, oonze keeper. Ien - nul achter, maar de Lodderaars gaav'n niet op. Ik meene nog te weten dat Jan Jutten van de bakker, twee keer 't net vōnd. Hoe as 't ook was, de uutslag was 3 - 3, en doar ko'j met thuus komm' n. En dan de stroat'nloop deur Ommen. D'r deud vanals met: Jongs, magies en vōlle vakaansiegangers. Van de foto's meen ik te kenn'n: Marie Gaasbeek - Jalving, Jolande Logtenberg - Wibier, Gaitie Jansen, Jan Kosters, Bé Petter en Henri Schuurman (den alweer). Hoe as de route precies was en wat de oafstand'n waar'n, weet ik niet meer zo net. In ieder geval was de finish veur Café Kouwen an de Markt en leup'n ze be'j Weertman rond, deur de Bermerstroate en de Varse-nerstroate, zo de Loarakkers in. Jopie meen'n te weet'n dat Bé Petter hef e'wōnn'n, maar d'r is 'n foto woarop Gaitie Jansen deur de finish giet. Aj goed kiekt, ku'j zien dat e 't broes op de bek hef stoan. Ik holle t'r op dat Gait van Grads Jansen uut Arriën de winnaar was.

Now komme wej an 't volleybaltournooi. Dat werd e'holl'n in de gyrrnastiekzaale van de Johan Seckelschoele an de Schammelte. Op de foto stoat 22 jongs en 12 magies en doarvan mag ie d'r van uut goan dat er altied 3 heer'n teams en 2 damesteams met deed'n. De ploeg van de Lodderaars bestōnd uut Gerrit Bouwhuus, Jan Jutten, Peter Kroamer, Bé Stien, Johan Willemsen en as gastspōller Cor Zandbergen (Zwil), den toen al in Ede woon'n. De aandere teams kwaam'n veur 'n deel van campings, veural van Vakantievreugd, al waar'n d'r wel meer Ommer, zoas Gosse van Elburg, Gerrit van Bats Gerrits, Reinie Bouwhuus, Frans en Henk Kodden en be'j de magies Sientje de Lange, Willy en Ineke van Kesteren, Marijke Hartman, Marie Jalving alweer en Dinie Kodden.

En dan, ik denke op vre'j dag, de daansoamend. Dat was 'n groot woagstuk, want nargens in Ommen ko'j in 't openbaar daans'n. D'r was wel daansles be'j "de Zon" in de filmzaal, maar dat was enkel veur Katteliek'n. De jongs die van 'n aandere karke waar'n, loer'n verlangend be'j de deure noar de magies. Maar Bernard Sprik waak'n d'r veur dat de kettters buut'n bleem. En zo in ien'n moal, kreeg'n de Lodderaars vergunnige veur 'n algemiene daansoamend in de Centrale Warkplaatse an 't spoor. 'T kost'n wel geld, veur de zaalhuure

en veur de meziek. En 't geld in kas was betuun. As t'r dan is weinug volk kwaamp? Maar kiek'n wat as 't werd. Met Everhard Siero van 't café, hadd'n de Lodderaars oaverlegd dat 't bekende orkest van Cherry van Beek uut Zwolle meziek zol maak'n. Everhard deud doar zelmens in met. Bé Stien wös nog dat later Boering van de belasting kwaamp vroag'n of dat de Lodderaars wel sociale last'n veur de meziek betaald hadd'n. Niet dus, maar t geld was op. Dat was op e'goan an 'n echt diner be'j Hotel Paping, want de daansoamend had zovölle op e'leverd dat de Lodderaars de bluumpies buut'n hebt e'zet. Now joa, 't was 'n groot succes, d'r kwaam 'n macht volk, en zej hadd'n d'r ook völle wark veur verzet, niet allinug met de verkoop van kaartjes en fris (op de foto's is gien bier te bekenn'n), maar ook veur de aandere oamend'n, woar as gien of weinug geld an te passe kwaamp. De leste wielerronde he'k al oaver e' schreenm. Maar van de foto's kwaamp me'j in herinnereg dat, in ieder geval de leste moal, ook 'n jeugdronde an de groot'n veuroaf gung. En zo kwaamp er een, bettien studentikoos, ende an viefjoar Lodderaars, wat as kwajongswark begön.